




SIARAN AKHBAR


KEMENTERIAN KESIHATAN

KENYATAAN MEDIA COVID-19 NEGARA BRUNEI DARUSSALAM 26 Rabiulakhir 1444 / 21 November 2022

- I. Dalam masa satu minggu kebelakangan ini, jumlah kes COVID-19 yang dilaporkan di Negara Brunei Darussalam menunjukkan sedikit peningkatan di mana kadar purata harian kes pada minggu lepas ialah 649 kes sehari, berbanding dengan 611 kes sehari pada minggu sebelumnya. Sebanyak 54,880 keputusan ujian ART telah dimuatnaik ke aplikasi *BruHealth* dalam masa satu minggu di mana 8.2% daripadanya adalah keputusan ujian ART yang positif.



Jumlah kes COVID-19 yang telah dilaporkan di Negara Brunei Darussalam sejak Februari 2022




Jumlah kes COVID-19 satu minggu kebelakangan berbanding dengan minggu sebelumnya

- i) Pada hari ini, **tiga kes** di dalam Kategori 5 yakni yang memerlukan rawatan di Unit Rawatan Intensif (ICU) manakala **dua kes** berada di dalam Kategori 4 iaitu yang memerlukan bantuan oksigen dan di bawah pemantauan rapi.
- ii) Sehingga kelmarin, 20 November 2022, kadar liputan vaksinasi COVID-19 di Negara Brunei Darussalam kekal berada di tahap yang tinggi dengan **78.8%** daripada keseluruhan rakyat dan penduduk negara ini telah mendapatkan dos ketiga vaksin dan **11.1%** juga telah mendapatkan dos keempat.
- iii) Dalam masa 24 jam yang lalu, 1 kes COVID-19 telah meninggal dunia di mana kes tersebut tidak dikategorikan sebagai kematian disebabkan COVID-19. Di kesempatan ini, saya mewakili warga Kementerian Kesihatan dan keseluruhan rakyat Negara Brunei Darussalam

mengucapkan takziah kepada keluarga Allahyarham. Semoga roh Allahyarham dicucuri rahmat dan ditempatkan bersama-sama para salehin.. (Al-Fatihah).

2. Pada hari ini, sebanyak **702 kes baru** telah dilaporkan iaitu 693 kes hasil ujian ART dan 9 kes adalah hasil dari 91 ujian makmal RT-PCR yang telah dilakukan dalam masa 24 jam yang lalu.
3. Sementara itu, *trend kes Influenza* dan jangkitan serupa *Influenza (Influenza-like Illness, ILI)* pada minggu lalu terus menunjukkan penurunan. Orang ramai adalah diingatkan untuk terus berwaspada dan mengambil langkah-langkah pencegahan seperti mengasingkan diri jika mengalami tanda-tanda jangkitan dan mengelakkan dari tempat-tempat yang penuh sesak. Segera berjumpa doktor jika tanda-tanda jangkitan berterusan atau semakin teruk. Dapatkan suntikan *Influenza*, khususnya bagi mereka yang berumur 60 tahun ke atas dan mereka yang mempunyai masalah-masalah kesihatan.



4. Di kesempatan ini, Kementerian Kesihatan ingin memaklumkan kepada orang ramai bahawa Negara Brunei Darussalam telah menerima bekalan vaksin Moderna (*Spikevax Bivalent Original/Omicron*) sebanyak 7,200 dos pada 20 November 2022 dan bekalan seterusnya dijangka akan tiba pada 25 dan 27 November 2022 ini nanti. Vaksin *bivalent* ini digunakan sebagai dos penggalak bagi orang dewasa yang berumur 18 tahun ke atas dan telah mendapat kelulusan daripada Pihak Berkuasa Kawalan Ubat Negara Brunei Darussalam untuk digunakan di negara ini. Penggunaan vaksin *bivalent* ini juga telah mendapat kelulusan daripada pihak berkuasa kawalan ubat dari beberapa negara lain seperti United Kingdom, Australia, Kanada, Singapura dan Kesatuan Eropah. Orang ramai yang ingin mendapatkan dos penggalak samada sebagai dos ketiga atau dos keempat boleh menempah slot vaksinasi di Pusat-Pusat Kesihatan yang berdekatan melalui aplikasi *BruHealth*.

5. Dalam pada itu, bermula pada hari ini, Kementerian Kesihatan akan melancarkan ciri **Indeks Kesihatan** dan ciri **Pemeriksaan Risiko** dalam aplikasi *BruHealth*. Ciri Indeks Kesihatan ini merupakan satu inisiatif bagi menghasilkan markah kesihatan (*health score*) keseluruhan yang khusus bagi setiap individu berdasarkan beberapa parameter perubahan dan saringan faktor risiko kesihatan. Saringan faktor risiko kesihatan adalah menggunakan soalselidik saringan yang disahkan (*validated screening questionnaire*) dan termasuk parameter berkaitan kesihatan mental, pemakanan, kegiatan fizikal dan penggunaan tembakau. Adalah diharap, ciri baru ini akan dapat membantu orang ramai untuk lebih peka mengenai faktor-faktor risiko gaya hidup yang boleh menyumbang kepada penyakit

tidak berjangkit dan gangguan kesihatan mental, dan oleh itu, menggalakkan orang ramai untuk mengambil langkah-langkah awal bagi menangani masalah-masalah tersebut.

6. Khusus bagi ciri Indeks Kesihatan, satu *pilot study* akan bermula pada hari ini dan akan berjalan selama sebulan. Kajian ini akan melibatkan 120 individu yang akan menerima notifikasi jemputan melalui aplikasi *BruHealth* masing-masing bagi menyertai kajian ini. Mereka yang menerima notifikasi jemputan ini adalah sangat-sangat dialu-alukan untuk melengkapkan Indeks Kesihatan di dalam aplikasi *BruHealth* bagi membolehkan Kementerian Kesihatan menilai ciri baharu ini. Daripada sini nanti, ciri ini akan diperbaiki dan dikemaskini sebelum dilancarkan sepenuhnya untuk kegunaan orang ramai.
7. Sementara itu, ciri Pemeriksaan Risiko yang dilancarkan pada hari ini di dalam aplikasi *BruHealth* adalah bertujuan untuk memberikan kemudahan kepada orang ramai untuk membuat penilaian risiko penyakit tertentu dan membuat perjanjian untuk menyertai Program Pemeriksaan Kesihatan (PPKK) yang disediakan oleh Kementerian Kesihatan.

(Video pada Skrin)

8. Semoga Negara Brunei Darussalam berserta seluruh rakyat dan penduduknya sentiasa terpelihara dari segala bencana dan wabak penyakit serta berada di dalam perlindungan Allah Subhanahu Wa Ta'ala jua. Aamiin Aamin Ya Rabbalalamin.

- **TAMAT** -

Rujukan : KK/PR/2

Tarikh : 26 Rabiulakhir 1444H / 21 November 2022